

# **PREZIDENTE REPÚBLIKA ESTENDE ESTADU EMERJÊNSIA BA LORON-30 TAN - Presidência da República de Timor-Leste**



Palásiu Prezidensiál Nicolau Lobato, Díli, 27 maiu 2020

Prezidente Repúblika, Francisco Guterres Lú Olo, ohin, liuhusi Dekretu Prezidente Repúblika dekreta estende estadu emerjênsia ba periodu foun loron-30, hahú husi kinta feira, oras 00, 28 maiu to'o sexta feira, oras 00, 26 juñu 2020.

Implementasaun estadu emerjênsia ba loron-30 ba oin sei aplika iha territóriu nasional tomak hodi hadook sidadaun hotu-hotu husi kalamidade públika ne'ebé bele mosu husi COVID-19. Renovasaun daruak ba estadu emerjênsia sei kontinua hametin kontrolu ho di'ak liu atu prevene moras COVID-19 tama mai teritórriu no ninia transmisaun husi ema ba ema.

Implementasaun Estadu emerjênsia Medidas hodi prevene sidadaun hotu-hotu iha Timor-Leste husi ameasa moras COVID-19 ba saúde públika sei suspende parsialmente direitu, liberdade no garantia balu ne'ebé konsagra iha Konstituisaun RDTL. Suspensaun parsialmente ba direitu, liberdade no garantia balu aplika ba: sirkulasaun internasionál liuhusi kontrolu sanitaria iha portus no aeroportus ou postu sira iha fronteira terrestre ho finalidade impede sidadaun sira tama mai teritóriu nasional ka kondisiona nesesariu hodi evita risku hadaet moras husi ema ba ema seluk liuhusi konfinamentu obrigatóriu ba sidadaun sira ne'ebé tama no foti medidas nesesariu ba sirkulasaun internasionál ba sasan, liberdade sirkulasaun bi fixzasaun residencia iha fatin ne'ebé de'it iha teritorriu nasional ne'ebé sei hala'o husi autoridade públika kompetentes ho hamenus risku moras ne'e hadaet liuhusi implementasaun medidas preventivas no sei bandu direitu ba rezistênsia pasivu no ativu.

Timor-Leste rasik deklara tiha ona laiha kazu konfirmadu ho COVID-19 tanba ema na'in-24 hotu-hotu rekuperadu no la hamate ema ida, maibé, ne'e la signifika Timor-Leste livre ona husi COVID-19. Prezidente Repúblika iha ninian mensajen ba Parlamentu Nasionál informa katak nesesidade ba estensaun estadu emerjênsia iha ligasaun forte ho evolusaun preokupante ba situasaun epidemilójijika no proliferasaun kazu rejistradu transmisaun komunitária COVID-19 iha Repúblika Indonézia, partikularmente iha Timor Osidental ne'ebé fahe fronteira ho Timor-Leste. Tanba ne'e ezjije nafatin manuntensaun ba aplikasaun sasukat estraordináriu balu, ne'ebé ladun makaas, atu trava pandemia, evita transmisaun kazu foun ba infesaun coronavirus iha territóriu nasional.

Timor-Leste deklara kazu pozitivu ida ho COVID-19 iha loron 21 marsu 2020, ho Estadu nia naran, iha 27 marsu 2020 Prezidente Repúblika deklara estadu emerjênsia ba fulan ida. Prezidente Repúblika estende estadu emerjênsia ba loron-30 tan, husi 28 abril to'o 27 maiu 2020.

Estadu implementa estadu emerjênsia ho objetivu atu hases sidadaun hotu-hotu iha Timor-Leste husi kalamidade públika ne'ebé bele mosu husi COVID-19.

Prezidente Repúblika horseik rona hanoin ne'ebé favoravel husi Konsellu Superior Defeza no Seguransa no Konsellu Estandu kona-ba pedidu estensaun estadu emerjênsia husi Governu no haruka mensajen ba Parlamentu Nasionál atu husu autorizasaun. Ohin, 27 maiu, Parlamentu Nasionál aprova mensajen Prezidente Repúblika ba estensaun estadu emerjênsia. Ho Parlamentu Nasionál ninian aprovasaun, Prezidente Repúblika dekreta estensaun estadu emerjênsia ba periodu foun loron-30.